

帶  
經  
堂  
詩  
話

帶經堂詩話卷七

漁洋山人

總集門 四

家學類

三伯祖光祿少卿養吾公

象

萬歷庚辰進士起家陽城知縣

擢監察御史官止卿寺近始見手書詩草一卷謹錄四篇以

存其梗槩

鳳音曲

鳳兮鳳兮集高岡七德九苞稱至祥五音六

律鳴朝陽鳴朝陽應明主

非帝庭寧高舉

鶴鳴曲

蒼松挺挺鶴

相招振翩翩翩翩來九霄警霜戛戛鳴九臯鳴九臯聲萬里明

月來清風起

璫琴曲

我攜綠綺奏薰風一曲相思彈未終淚垂

絃絕送歸鴻送歸鴻坐明月人不見心如結

暮雨曲

忽忽白雲

羅神霄霏霏暮雨平河橋有美一人路迢迢路迢迢望無極

夢相見醒相憶十叔祖翼吾公象節萬歷壬辰進士改翰林授

簡討少有詩名豪今無傳唯鄭簡菴獨復先生新城舊事載其

二句云古寺人來花作供孤城春盡草如煙八叔祖伯石公

象十七叔祖季木公象春十八叔祖用晦公象明詩別詳三王公

集季木公元名象翼用晦公元名象履分廿餘話并錄三

池北偶談從叔祖季木考功跌宕使氣常引鏡自照曰此人不為

名士必當作賊嘗奉使長安飲於曲江賦詩云韋曲杜陵文

物盡眼中多少可兒墳其傲兀如此有題項王廟樂府一篇

云三章既沛秦川雨入關更縱阿房炬漢王真龍項王虎王

珙三提王不語鼎上杯羹棄翁姥項王真龍漢王鼠垓下美

人泣楚歌定陶美人泣楚舞真龍亦鼠虎亦鼠此詩劉公馥

絕愛之公與文光祿太青友善詩亦齊名錢牧齋尚書云文

天瑞如魔波旬具諸天相能與帝釋戰鬪遇佛出世不免愁  
宮殿震壞王季木如西域婆羅門邪師外道自有門庭終難  
皈依正法然其警策處要自不可磨滅列朝詩中僅錄三首  
又非佳作

居易錄

十七從叔祖季木仕南考功郎中以詩名萬歷間與文

光祿天瑞翔鳳齊名牧齋論之曰天瑞如魔波旬具諸天相  
能與帝釋戰鬪遇佛出世不免愁宮殿震壞季木如西域婆  
羅門教邪師外道自有門庭終難皈依正法此雖戲論其言  
自確然今所傳問山亭前後集汰其蕪雜擷其菁英可傳者  
尙可得什之二三也少時詩如故人江漢絕疎雨戶庭過之  
句不減大復蘇門八叔祖伯石仕爲姚安府同知著迂園詩  
集詩名遠出考功下然謹守唐人矩矱不失尺寸如詠魯仲

連云孤城一飛矢六國有心人又蕭條兩岸柳悵悵五更雞  
魚藏蘆底穴雪壓竹間廬青熒茅舍火縹緲竹林煙南雁迎  
花早東風帶雪多月明才十日人病已經旬皆五言之選也  
後人不振予購其刻板藏之十八叔祖晦甫著鶴隱雨蘿諸  
集才不逮考功而欲馳驟從之故時有銜蹶之患未能成家  
今刻版僅有存者予有三公詩選頗有可傳

漁洋詩話

十七叔祖考功季木

象春原名象異

天才排冪目空一世使秦游

曲江有詩云韋曲杜陵文物盡眼中多少可兒墳題項王廟  
壁云三章旣沛秦川雨入關更肆阿房炬漢王真龍項王虎  
玉玦三提王不語鼎上栢羹棄翁姆項王真龍漢王鼠垓下  
美人泣楚歌定陶美人泣楚舞真龍亦鼠虎亦鼠古今判劉  
項無此雄快八叔祖郡丞伯石

象艮

亦有詩名五言如蕭條兩

岸柳惓惓五更雞魚藏蘆底穴雪壓竹間廬青熒茅舍火縹緲竹林煙孤城一飛矢六國有心人龍源花外水鹿角雨中  
山皆中唐之選也十八叔祖大寧令用晦象明原名象履詩亦有足傳  
如日日輕雷送雨聲小窻歷亂竹枝橫水痕時落還時漲枕  
上看山秋欲生細雨新晴百草菲含桃初染杏初肥奚童競  
撲柳花落嬌鳥時銜榆莢飛水淨欲浮蝌蚪字苔深爭迸籜  
龍衣闌珊春色歸何遽簾外輕寒臘當作蠟屐稀又有句云老  
松帶露滴巾角亂石欹風迎馬前余嘗輯爲琅邪三公集  
先世父侍御府君諱與允字百斯崇正中以劾總兵官鄧玘  
忤時相罷歸甲申聞國難闔門自經明史載忠義傳有隴首  
集一卷南城陳伯璣錄其詩與雁門孫自谷簫曲黃海鈴岡袁臨  
侯合刻之爲四忠詩錢宗伯贊之曰遺音危苦孤桐玉律吟

龍夏石梵猿噉月浩歌悲嘯雷風交加蟲豸不螫象華其牙

云  
漁洋詩話 并錄一

分甘餘話先伯父侍御公詠梅云繁英任似火冰稜自如石南枝與北枝不作春風格陳伯璣云公忠烈之性已見於此

再從伯與玫字文玉甲辰進士中書舍人從兄士驥之父也好爲豔體少時有悼亡詩句云二十五年將就木一千里路不通書欲喚小兒求夢草定呼妙子到稠桑皃皃白兔東西顧恰恰黃鸝四五聲通德每宵談祕事清娛隨處品名山皆工有籠鶯館集行齊魯間

居易錄 并錄一

漁洋詩話從伯文玉與工豔體詩所著有籠鶯館集無題云二十

五年將就木一千里路不通書皃皃白兔東西顧恰恰黃鸝四五聲通德每宵談祕事清娛隨處品名山皆工

先府君

諱

與勅字欽文別字匡廬少工駢麗之文晚年猶間

爲之中歲好爲詩不孝兄弟間請編錄輒不許曰吾偶寫懷  
抱如絃之有音旣絃停音寂何用畱此枝贅爲耶

漁洋文

先兄考功平生詩不減二千餘篇已刻者曰表餘堂集曰十  
笏草堂集曰辛甲集曰上浮集海內耆宿論之詳矣杜于皇  
以爲埽絕依傍期于親見古人孫豹人以爲取法少陵稍出  
入於康樂東坡之間汪茗文以爲幽閑澹肆極其性情之所  
之而夷然一歸於正尤展成以爲如深山道人草衣木食而  
神色敷腴非食肉之相林鐵崖以爲登臨矚望多豪雋非常  
之詞時逃於貝葉時逃於綺語毛馳黃以爲磅礴在中鬱紆  
在外皆忠愛悱惻之所激發蓋諸公之論云然而先生嘗題  
襄陽詩曰魚鳥雲沙見楚天清詩句句果堪傳一從時世矜



高唱誰識襄陽孟浩然其微旨所寄如此予往撰感舊集既  
援篋中中州二集附錄季川敏之兩元之例以先生詩終卷  
今二十五年矣適刻東癡蕭亭二家詩於京師乃復擇先生  
詩什之二三次爲四卷并刻以傳仍取諸公品藻之語略爲  
序述以俟論定或曰子獨無言可乎曰不敢也無已則舉坡  
公所云出新意于法度之中寄妙理于豪放之外以評是詩  
其亦無溢美爾矣

并錄六

池北偶談先考功西樵兄少時有詩曰雄風涼大壑雌蜺貫秋城  
時推警策按法苑珠林又有雄雷雌雷

香祖筆記先兄考功集詩屢經芟削最後止刻四卷佳句佚者頗  
多略記一二如灘縣道中云人煙通下密橋路遶東丹夏夜  
詞云夢覺聞花漏星河一帶橫感興云大人有賦言仙意內

景何方駐聖胎此類尙夥予少時詩如送人知鄞縣云天晴  
眞臘樹日射灌門潮分賦菊名孔雀尾云未登嵇氏狀卻號  
孔家禽贈徐東癡云湘東品第畱金管江左風流續玉臺過  
郡城云郭邊萬戶皆臨水雪後千峯半入城舟中小飲云行  
藏略已同仙尉得失何妨任老兵餘亦頗有可存者今略識  
其槩耳

漁洋詩話

西樵甲辰之獄吏議羅織鍛鍊半載始白扁舟南下余  
迎於秦郵相見持之而泣西樵都不及患難時事直取一巨  
編擲余前曰弟視吾詩境地差進不入歎其曠達

全上

甲辰歲西樵戲爲蟲豸詩二十首蓋有所感槩而作余  
見之曰此卞彬蚤蟲賦之流也腹與龜腸潔聲兼清露遙何  
緣塵垢裏強著伴金貂

蠅

早讀漆園書夢亦羨栩栩魏收自

輕薄胡爲波及汝蝶共道輸君獨牽絲巧若神祇應同吉網

莫便詡經綸龜手推故神物名流解望塵將軍揖客少莫訝

叩頭頻叩頭汝腹能幾許禪中漫鬪雄還思蝨父語直有魯

連風蝨爾軀旣已輕爾行復能跳無如湯沐頻有時亦相弔

蚤委贄大蘭王項領足意氣縱解認前身詎羨轉輪貴牛領

託體槃瓠族豕蝨略相類狗苟而蠅營名實竟雙備狗蝨雖游

戲三昧然非才人不能道也

分日西樵古意云鷓鴣兩兩栖蒲沙昨夜郎來眠妾家滅燭

入門帶星去看郎一似菖蒲花最質而古

漁洋文士正與西樵先生爲兄弟四十年撫我則兄誨我則師

真有如子由所云云者先生歿禮部公泣謂士正曰而與而

兄實有牙生輟弦之痛豈但鶴原之悲也

宗柳案山人閱西燕故書流賦云痛絕人琴今已矣牙生從  
此竟摧弦用此語也或與上句例看以爲不切兄弟事固矣

予兄弟少讀書東堂堂之外青桐三白丁香一竹十餘頭而  
已人跡罕至苔蘚被堦紙窻竹屋燈火相映呬唔之聲相聞  
如是者蓋十年長兄考功先生嗜爲詩故予兄弟皆好爲詩  
嘗歲莫大雪夜集堂中置酒酒半出王裴輞川集約共和之  
每一詩成輒互賞激彈射詩成酒盡而雪不止久之予三人  
馳驅南北獨仲兄家食以老有詩數百篇久沈翳篋中暇乃  
擇三之一刻之與古鉢同附考功集以傳曰抱山者兄少日  
所居堂因以自名其詩蓋取諸孟東野句云

已上蠶尾續文并錄二

漁洋詩話

仲兄禮吉

士

少時有和唐祖詠望終南殘雪詩三首云

微風打窻紙凍雀鳴簷端起看松竹色蕭蕭增薄寒將雪無  
雪色色在浮雲端煨芋對新雪骨與梅花寒遠山直西牖高

高出林端朝來望新霽四顧清光寒

蠶尾續文

仲兄所刻抱山詩集凡二卷嘗和月泉吟社詩五十餘

章多警策未及鋟梓

兄諱士祐字叔子一字子側號東亭生於常熟官署因小字  
虞山年十許歲時嘗雪夜集東堂長兄偶簡輞川絕句命屬  
和兄詩先成有日落空山中但聞發樵響之句長兄激賞不  
肖箴仕揚州時家嚴在官舍兄遂畱侍定省之餘兄弟論文  
不管家塾長兄時官吏部寄詩云聞道汝兄去提攜慰寂寥  
燈花開幾許稚子喜應饒共試南泠水同看北斗杓何時如  
意舞一破廣陵潮蓋羨兄與不肖聚首之樂而悵已之離居  
也官舍有竹亭鶴柴雜植梅花辛夷修竹兄每婆娑讀書其  
閒癸卯秋試受知張給諫螺浮張禮部受菴兄有聲場屋十

餘年至是得雋年三十二矣甲辰長兄以磨勘事坐累兄職  
納橐餠事白更相慰藉長兄賦詩四章贈兄其略云諒爲死  
喪憂且復數相見炎蒸午不避霜露曉能踐拘幽昧消息緩  
急視子面患難故舊疎艱虞友朋賤傷哉鶴原心匪石不可  
轉戊申秋南游汎大江至姑孰攬青山白紵之勝多所題詠  
庚戌會試受知相國魏公大宗伯龔公少宰王公閣學田公  
翰林夏公 廷對在高等已而館選不得與辛酉至京師需  
次之暇讀書賦詩近和張文昌秋懷詩十章詞旨和平無悽  
戾之音竊意其懷抱少舒詎謂遂成絕筆乎詩初學李長吉  
後悔之不復作庚子游京口三山乃復爲數篇南城陳伯璣  
刻傳之遊吳興白雀寺與萊陽朱荔裳婁江王唯夏虞山嚴  
武伯吳江葉元禮分韻賦五言古詩舉座歎其清絕舟過犇

牛賦詩云楓葉蕭蕭露氣清蒲叢獵獵早潮生扁舟跂腳聞  
風水便有長江萬里情藝林傳頌之

漁洋文 并錄二

鑑尾續文

古鉢山人詩一卷凡爲古今體百篇初與其弟士正同

學詩於兄考功氏常夜雪集東堂同和輞川集山人得句云  
云考功驚歎遊吳興與諸名勝共賦五言詩成諸公閣筆以  
爲孟襄陽微雲澹河漢之比

漁洋詩話

余兄弟少讀書東堂嘗雪夜置酒酒半約共和王裴輞

川集東亭

士

得句云日落空山中但聞發樵響兄弟皆爲閣

筆。東亭與宋荔裳嚴武伯

熊

葉元禮

舒崇

諸名士游吳興道

場山其賦五言詩兄詩先成羣公歎絕以爲微雲澹河漢之  
比。計甫草曰三王竝負盛名西樵阮亭蚤達故聲譽易起  
乃東亭之才詎肯作蠡腰哉東亭舉庚戌進士早歿余刻其

詩二卷曰古盃集

王士純字孤絳贈光祿寺少卿十二叔祖完初公象復之孫白

哲美風姿書法李北海弱冠殉崇正壬午之難有新月詩云

乍見一簾水回頭月抱肩黃如浮醪酒瘦比壓琴弦

并錄一

古夫于亭雜錄從兄孤絳士純詠新月詩云乍見一簾水回頭月抱肩黃

如浮醪酒瘦比壓琴弦孤絳少有叔寶神清之目書法擅絕

一時弱冠殉崇正壬午之難

予所居小圃石帆亭南有池曰春草一日集子弟羣從賦詩

弟士驪慢亭有天際星河倒入池之句予甚激賞之

已上漁洋詩話

附錄分廿餘話先高祖太僕忠勤公遺墨止有采三殿大木於黔中時所為視殿詞及史論數篇先曾祖大司徒公著述有炳燭編攝生編百警編皆門生郭文毅明龍正域為序及諫議疏稿先伯祖大司馬公著述有皇祖開天玉律并進疏經理脗肱奏議總督宣大奏議大半載陳大樽子龍經世八編而混入太倉王少司馬思質竹疏數篇弁州先生父也外謫當收正本兵及署太宰奏議無專刻今邑誌略載數篇先祖方伯贈大司寇公著述羣芳譜最著康熙四十六年特旨命翰林官汪灝張逸少等四人續



廣之又御製序文冠諸編首餘如剪桐載筆操觚勸說心賞編日省錄救荒成法舉  
業津梁等凡十餘種先伯父侍御公著述有隴首集先兄吏部西樵有然脂集二百卷  
十笏草堂集西湖竹枝三舟倡和詞廣陵倡和詞先仲兄禮吉有抱山堂集先叔兄叔  
子有古鉢集皆已刻梓又從叔祖郡丞定宇公迂園集少司馬立宇公西臺奏議巡撫  
奏議吏部季木公問山亭集齊晉李杜詩評大寧令用晦有鶴隱集從伯文玉龍齋館  
集余嘗欲錄其簡要合為一編藏之家塾奔走四方卒卒未暇今老矣未必能終踐此  
志聊志其目  
存之家乘云

自述類上

予幼入家塾肄業之暇即私取文選唐詩洛誦之久之學為  
五七字韻語先祖方伯府君先嚴祭酒府君知之弗禁也時  
先長兄考功始為諸生嗜為詩見予詩甚喜取劉頤陽一相明相國

訓之先生所編唐詩宿中王孟常建王昌齡劉脊虛韋應物

柳宗元數家詩使手鈔之十五歲有詩一卷曰落箋堂初稟

兄序而刻之未幾中辛卯鄉試始與邑隱君徐夜東癡定交

以詩往還予贈徐句云湘東品第畱金管江左風流續玉臺

徐答云野雁想潛窺摹繪得其真者是也乙未中會試與海

內聞人縞紵論交交道始廣五月買舟歸里始棄帖括專攻

詩故予詩斷自丙申始丁酉秋倡秋柳社于明湖即大明湖亦名濯纓湖又名蓮

湖子二東名士如東武邱常石海石清源柳肅公隆任城楊久通聖

宜兄弟益都孫寶仲孺輩咸集予首倡四詩社中諸子暨四

方名流和者不減數百家戊戌廷對不與館選以觀政聞

京師始與長洲汪琬茗文南海程可周量武進鄒謨訐士輩

倡和爲詩已亥再入都謁選吏部汪程皆官都下又益以顯

川劉體仁公馥鄆陵梁熙曰緝是冬崑山葉方子吉海鹽彭孫通

駿孫皆來定交相倡和庚子之官揚州揚州衣冠輻輳論交

遍四方又數之金陵姑蘇毘陵所至多文章之友從遊者亦

衆甲辰遷禮部與翰林李檢討天湘北今兵部陳檢討廷子端

詩評卷七

自述

九

今都察院左都御史

臺中董御史

文驥

玉虬洎梁劉汪程輩切劘爲詩歌古

文而合肥龔端毅公芝麓方爲尙書爲之職志已酉奉使淮

浦庚戌冬入都會考功兄再官吏部萊陽宋按察

疏

玉叔嘉

善曹講學

爾堪

子顧宣城施叅議

章間

尙白

後入翰林官侍讀

華亭沈副使

荃貞

後復入翰林官至詹事兼侍讀學士加禮部侍郎諡文恪

皆集京師與予兄弟暨李陳諸

子爲詩文之會居無何葉編修

方

子吉

後官至掌院翰林學士加禮部尙書諡文敏

亦至

壬子七月而予奉使入蜀尋以內艱歸里考功兄以癸丑七

月歿乙卯七月再入都故人在者唯李陳葉三君皆官翰林

彭亦時一至焉

今內閣學士兼禮部侍郎

丙辰丁巳間商邱宋

榮

牧仲

今巡撫江西右副都御史

邵陽王

又

幼華

後官戶科給事中

安邱曹

貞吉

升六

今徽州府同知

曲阜顏

光敏

修來

後官吏部考功郎中

黃岡葉

封

井叔

後官工部主事

德州田

雯

子綸

今巡撫貴州直隸都御史

謝輝千

後官吏部考功郎中

晉江丁

煒

雁水

官湖廣按察使

及門人江陰曹

禾

頌嘉

後官國子祭酒

江

都汪

懋麟

季角

刑部主事

皆來談藝予爲定十子詩刻之戊午正月

予奉

旨改翰林侍讀庚申擢國子祭酒時李公爲內閣學

士陳葉二公相繼爲翰林掌院學士沈公爲掌詹而施彭及

汪

琬

陳

維崧

諸君皆在翰林亦一時之盛也

予幼自乙酉丙戌間避兵長白卽史記所稱副嶽也酉陽雜

俎記山中崔羅什沙彌二桃事其峯巒洞壑橫側單複之奇

槩未之及也乙未舉進士後丙申春始與邑高士徐

夜東癡

同遊凡柳菴上書堂醴泉寺諸勝皆至焉刻長白遊詩一卷

癸丑丁內艱以先祭酒府君命養病山中僅至柳菴生生菴

唐李菴醴泉寺距昔遊已十八年乙丑丁外艱丁卯往視內

兄張隱君

實居

賓公于山中遂同至書堂柳菴葛洞未及醴泉

而返距癸丑之遊又十三年矣名山近在戶庭宦遊四方輒

不得歸歸而往遊動逾十稔中間唯丙申之遊最樂癸丑以先恭人艱歸又值先兄考功之變丁卯以乞假歸省尋遇祭酒府君大故豈復有山水之樂哉卽此一山之遊今昔陵谷之感不啻如右軍禊帖云云矣已上居易錄

順治庚子仲冬予病初起有事南蘭陵八日而返得遊記六題名七古近體詩四十編爲一通曰過江集程子崑崙予畏友也而得與之乘清宴理遊事延陵季子之高風陳修撰之忠節予之所尙論而服膺者也而得拜其墟里問其子孫弔其流風餘韻京口三山及招隱鶴林諸寺予十年夢寐而不獲一至而得放舟大江躡屐幽壑窮極煙風雲水之變態斯遊也可謂不徒矣家兄東亭懷京峴之勝遂同斯遊得詩凡若干首附於後

漁洋山在鄧尉之南太湖之濱與法華諸山相連綴巖谷幽  
窅筇屨罕至登萬峯而眺之陰晴雪雨煙鬟鏡黛殊特妙好  
不可名狀予入山探梅信宿聖恩寺還元閣上與是山朝夕  
相望若有夙因乃自號漁洋山人云是役也發朱方次雲陽  
抵吳閶歸經伯鸞之溪前後所得詩六十餘篇題曰入吳集  
嘗讀東坡先生集云少與子由寓居懷遠驛一日秋風起雨  
作中夜愴然始有感慨離合之意嗣是宦遊四方不相見者  
十八九每秋風起木落草衰輒淒然有所感蓋三十年矣故  
其述舊詩曰西風忽淒厲落葉穿戶牖子起尋袂衣感歎執  
我手朱顏不可恃此語君勿疑別離恐不免功名定難期而  
其終篇則曰雪堂風雨夜已作對牀聲至陳州東府諸篇一  
則曰夜雨何時聽蕭瑟一則曰對牀定悠悠夜雨空蕭瑟子

由答坡公詩亦曰誤喜對牀尋舊約不知漂泊在彭城予每  
循覽愴然不能終卷然爾時方與諸兄讀書家園肩隨跬步  
未知此語之可悲也弱冠以來各以世網奔走四方回憶曩  
時家園之樂不可得然後知兩蘇公之詩之可悲有什倍於  
疇昔者蓋情隨事遷而感慨係之矣予以順治十七年來佐  
揚州中間與禮吉一別與東亭再別西樵自大梁過廣陵對  
牀一夕遂別於鑾江之上嗟乎予兄弟少無宦情同抱箕穎  
之志居常相語以十年畢婚宦則耦耕醴泉山中踐青山黃  
髮之約息壤在彼得毋笑是食言多乎是歲癸卯西樵奉  
命主中州試東亭舉山東榜予之居揚州且四年矣除夕偶  
編次一歲所作慨然書此

已上漁洋文

予三至金陵庚子以鄉試分考至渡江日已曛黑東炬登燕

子磯題詩石壁翼日金陵競傳寫之和者甚衆辛丑以讞獄  
至作秦淮雜詩金陵遊記每讞事畢輒肩輿往烏龍潭靈谷  
瓦官諸寺城南高座長干諸古刹探幽訪古而公事未嘗廢  
也乙巳內遷禮部解郡後客金陵凡前所未經歷者如牛首  
祖堂棲霞花山與方文爾止共遊焉補遊記數篇通集所作  
詩文爲白門前後集汪琬鈍翁序之及乙丑祭告南海歸過  
金陵當時老友皆已淪沒唯倪紱雁園以翰林請假里居顧  
予舟中予感賦一詩云往日秦淮水朱樓賦洞簫白頭故人  
盡重過石城橋一夕卽解纜渡江矣

順治庚子冬在揚州病起以公事渡江往毘陵與京口別駕

程

康莊

崑崙同遊金焦北固及鶴林招隱竹林寺海嶽菴諸名

勝有過江集張吏部

九微

公選序之云筆墨之外自具性情登



覽之餘別深懷抱知己之言也辛丑春以例往松江謁直指  
次泚墅聞鄧尉梅花盛開遂輕舟入太湖口自光福元墓西  
聖恩寺四宜堂賦詩數十篇而返因自號漁洋山人有入吳  
集予自少癖好山水嘗憶古人身到處莫放過之言故在揚  
州日于金陵京口梁谿姑蘇諸名勝皆于簿書期會中不廢  
登臨而公事亦無濡滯者吳梅邨偉業師謂予在廣陵日了公  
事夜接詞人以擬劉穆之予豈敢望古人若山水之癖則庶  
幾近之耳寺中齋禱無事因憶舊遊略述之以示兒輩

康熙壬子予以戶部郎中奉命典四川鄉試所過名山如  
井陘霍山姑射中條雷首太華少華終南太白雲棧嶓冢錦  
屏天柱岷山青城驀頤凌雲峩嶠烏尤五峯塗山平都上崑  
瞿唐三峽巫山十二峯隆中岷首蘇門百泉諸勝舟車遄發

迫于王程或至或不至凡登望皆有詩爲蜀道集又別爲蜀道驛程記四卷施愚山侍讀曹我肴禾祭酒徐東癡夜隱君序之葉文敏訥菴題長句於卷首又以書抵予云蜀道新詩每一篇具有二十分力量云

甲子十月予自國子祭酒遷少詹事十一月奉命祭告南

海是冬大雪所過如嶧山雲龍龍眠瀟岳黃梅五祖九江匡

廬南昌西山吉安青原贛州十八灘八境臺梅嶺韶石大廟

瀕陽中宿羚羊諸峽濛濛龍頭影彈子磯觀音岩越秀白雲

西樵七星岩諸山皆與粵中故人陳恭元孝屈大翁山輩賦

詩獨不及登羅浮啖新荔爲兩恨事耳歸渡彭蠡阻風南康

與南豐湯先生來暢菴南康周太守燦星公孫徵君枝豹人

同遊廬山白鹿洞棲賢寺望五老峯觀三峽玉淵諸名勝又

自玉京山至萬杉開先諸寺觀青玉峽瀑布欲由開先往歸  
宗觀水簾以風便登舟不果至今耿耿于懷予詩所云譬彼  
禽尚遊五嶽得其四是也既渡湖口歷石鐘大孤小孤三山  
天門采石牛渚南眺姑孰之青山白紵橫望九井約略見之  
渡江至滁州逆旅卽次遂冒雨遊琅邪山醉翁豐樂二亭訪  
西澗度清流關及渡河取道曲阜謁闕里林廟望泰山竝徂  
徠入青石關以歸有南海集及皇華紀聞若干卷南行志北  
歸志廣州遊覽小志各一卷蜀道南海之行往返皆萬二千  
里而予且倦遊矣

已上居易錄

宗枬按山人宦轍所經類多題詠吾浙巖壑奇秀節展沓然竊爲山靈抱憾爾讀自撰  
年譜知山人隨方伯之任時才四歲後不復至又案山人三奉使事俱在子年亦一異  
也

長白大谷之東南北兩峯呀然中開有小山突起當綰轂之

口曰于茲山又曰魚子其下有流水卽水經注魚子水也山  
之上有夫子亭相傳陳仲子灌園處予別業在其下坐臥草  
堂朝夕與此山相對遐思仲子之高風慨然如或遇之因以  
古夫子名堂焉予自甲申歸田十月出都門是年冬不雪而  
雨雨且連日夜明年春夏兩有安德之役其冬駛雪乃復有  
詩夏秋避暑西城別墅之鷗舫舫在小菴畫谿之右敞北牕  
則修竹數百挺蟬鳥鳴和不見曦景東窻俯谿夢覺時閒游  
魚撥刺荇藻閒亦復欣然知魚之樂時作小詩脫稿卽付兒  
煉漑輒與蕭亭歷友司允諸君屬和積成卷軸其語不越一  
邱一壑鳥花猿子之閒暇錄一通寄武林吳子寶厓新安汪  
子于鼎不足示外人也

予次康熙戊子一歲之作爲蠶尾後集得五七言絕句二百

餘首而古律詩才什之一於是先絕句而餘體反附其後是歲予年七十有五篤老矣目昏眊不能視書唯大字本略可辨識偶案上有宋洪景廬氏唐人萬首絕句舊板本乃目取讀之兩月而畢於是撰錄其尤者凡九百餘首以繼文粹詩選之後弇州先生曰七言絕句盛唐主氣氣完而意不必工中晚唐主意意工而氣不必完予反復斯集益服其立論之確毋論李供奉王龍標暨開元天寶諸名家即大歷貞元間如李君虞韓君平諸人蘊藉含蓄意在言外殆不易及元和而後劉賓客杜牧之李義山溫飛卿唐彥謙諸作者雖用意微妙猶可尋其鍼縷之跡有所作輒欲效之然終不能近也故是歲所爲絕句遂溢至二百首諸體寥寥未便割棄乃存而附之卷末予甲申歸田後詩曰古夫子亭稿此卷則爲蠶

尾後集以綴蠶尾正續兩集之後實則古夫于亭稿後一年之作云

已上蠶尾續文

帶經堂詩話卷七

帶經堂詩話卷八

漁洋山人

總集門五

自述類下

予少時與先兄考功同上公車每到驛亭輒題素壁筆墨狼藉率不存豪逸去多矣數年來往往從友人口中得之恍忽如夢不忍盡割略記于此河口花明錦纜春研繚綾子領邊巾不知何事牽儂思欲懸紅箋賦洛神徐隱君東甌嘗口誦此詩不見湘中舊

犯人西園蘭石愴如新低徊十五年前句祇有蛛絲絡暗塵

彭少宰孫道義門誦之關河連夜雨驛路一聲蟬湯右曾西廬王風迴邸閣聞鈴

馱日落關山見戍旗彷彿夢中尋蜀道打包身度棧雲西徐學

士健菴誦之且題其右云台驛斜陽聽錦聲分明棧路蜀山行讀君題句成先識天遣才人過錦城往跡流傳本事詩廿年如夢

不堪思重來頭白風情盡誰記巡檐繞柱時

江耀麟叔定誦之

趙北燕

南水四圍此中避地可忘機垂垂笑實迎秋熟拍拍鷗羣接

翅飛蟹舍都連黃篾舫釣人相映綠簑衣淮南小別今三載

魚稻珠湖願竟違

曹祭酒禾我嶺榜旅舍日漁洋詩屋

池北偶談

余自少年與先長兄考功同上公車每停驂輟輓輒相倡和

書之旗亭驛壁率不畱棗諸同人見之者後在京師往往為

余誦之恍如昨夢近見吳江鈕玉樵

瑋

觚賸亦載余逸句因

憶丙午自里中北上戲題德州南曲律店壁一絕云曲律店

子黃河厓

亦地名

朝來一雨清風霾青松短壑不能住騎驢又

踏長安街語雖詼嘲不足存亦小有風趣聊記于此

香祖筆記并錄一

蠶尾續文

康熙四十年五月二十日午憩曲律店憶三十年前過

此戲題絕句云曲律店接黃河厓朝來一雨清風霾青松短



壑不能住騎驢又踏長安街今老矣憶斯語爲之慨然

順治辛丑春雨中泊舟楓橋寄先兄西樵二絕句云日暮東  
塘正落潮孤篷泊處雨瀟瀟踈鐘夜火寒山寺又過吳楓第  
幾橋楓葉蕭條水驛空離居千里悵難同十年舊約江南夢  
獨聽寒山半夜鐘今荏苒五十年矣西樵下世亦已三十餘  
年回思往事爲之撫然而歎

分廿餘語

宗楠附識鮑待翁亞谷叢書漁洋先生於順治辛丑遊吳題詩楓橋詩話載之余以康熙庚子再遊鄧尉泊舟楓橋追憶其事屈指剛六十年口占一絕句云路近寒山夜泊船鐘聲漁火尚依然好詩誰嗣唐張繼冷落春風六十年翁名鈔字冠亭雲中人嘗爲湖之長興令風流好事不沾俗吏之塵著述數種叢書其一也

辛丑在廣陵聞中友人許天玉公車北上以缺資斧來告會  
囊無一錢先室張安人笑曰君勿憂我爲君籌之除腕上跳  
脫付予曰此不足爲許君行李費耶予亦一笑持遺天玉天  
玉作長歌記其事頗援古賢媛爲比

予奉使入蜀時兩喪愛子宐人病骨支牀而予有萬里之行  
宐人慮傷予心破涕爲笑扶病治裝刀尺之聲與嗚咽相聞  
唯恐予之聞之也予途中寄詩云何必言愁始欲愁離騷端  
只是離憂兩年再墮童烏淚萬里虛爲諭蜀遊落日深山聞  
杜宇秋風古驛下金牛傷心欲寫蠻箋寄十樣空傳出益州  
次灞橋再寄詩云長樂坡前雨似塵少陵原上淚霑巾灞橋  
兩岸千條柳送盡東西渡水人 已上漁洋文

附錄張空人行進後段空人十四歸予予性疎散好讀書不問家人生產空人以勤儉  
佐予內外終然今已矣予偶讀文選至潘岳省悼亡詩輒閉目不欲觀又客秋過河間  
和沈敬甫鈞弋夫人歌一篇語近不詳輒創藁他日入室思  
人流芳已歟遺挂壁憶時省之詩豈非神先告之乎悲哉

空室陳孺人懿行儉德可書者非一性慧強記初從予口授  
唐絕句百首皆成誦吟諷中律呂予所賦詩亦頗能誦數十  
篇禪誦之餘每舉以相娛樂旣十四五年扣之一無遺忘似

有慧業者然

歸尾文

宗相崇山人年譜康熙十五年丙辰九月張恭人歿于家而陳孺人卒在癸酉四月張孺人卒在己卯六月俱書側室第陳於丁巳十月聘娶視張之少從夫人俱來爲勝妾者稍異耳讀集中行述二首自明

康熙十一年六月奉

命典蜀試七月朔與家兄西樵考功

及家人別余方有兒渾之痛伏枕浹旬龜勉就道初十日抵平定州夜雨夢兒渾髮髯如平生枕上拔淚成一詩

蜀道驛程記

長女小字阿端以康熙己未五月初九日生於京邸卒年十有二三女阿宮以甲子九月二十日生京邸女生而余遷宮尹故以名之十歲病死始阿端之葬也予爲詩哭之曰左氏嬌女詩陳王金瓠詞念情非太上萬古一銜悲旣而自疑曰一詩而引二事是疑於兩女也不祥然孰意其果識乎

歸尾文

宗相按山人自述其詩多散見諸書特采數條於此卷中以見其性情之篤非漫然者又按山人交遊甚廣此下諸條或爲平生知己或爲布衣至證所謂文章有神交有道

也而其他則  
分屬各類云

余以順治乙未舉禮部戊戌始赴廷對一日期集禮部新

郎君皆在全椒吳玉隨

對國

大呼入曰此中何者爲濟南王郎

乎衆愕然余方踈腳榻上笑曰君自辨之吳直前提余臂曰  
此卽是也衆爲一笑後吳以第一甲二人及第假過真州贈  
余詩云如此青天如此月兩人須問大江秋詩詳鑾江倡和  
集并錄二

香祖戊戌同年吳侍讀默岩全椒人榜眼及第詩未入格而  
筆記頗有勝情予官揚州時常與其客儀真一日過予客園置酒  
酒間作擘窠大字及便面數事皆卽事漫興之語令人解頤  
尙記其一則云少陵云一洗萬古凡馬空東坡云筆所未到  
氣已吞才人須具此胸次落筆自爾不凡唯阮亭可以語此

頃之予衣領上偶見一蟻卽又云宰官衣領幕上一蟻子此  
正須耐煩以爲勝俗客耳雖偶然游戲皆有理趣久之露坐  
月色皎然賦絕句云如此青天如此月兩人須問大江秋予  
和之得四首翰林兄弟皆名士廨屋三閒分兩頭及第紅綾  
分餅日閉門黃葉著書秋鳴嶺園中小山名斜日森碧篠人影參差  
曲岸頭頃刻疾書兩丸墨山蟬墮地數聲秋又二詩不具錄  
詳鑾江倡和集

分廿餘話同年吳默岩在儀真常書許彥周詩話老杜丹青引一  
洗萬古凡馬空坡公觀吳道子畫壁詩筆所未到氣已吞唯  
二公之詩各可以當之而舉余少作周文矩莊子說劍圖詩  
使筆如劒劒氣出之句以爲唯余詩足以當之今五十年默  
岩墓有宿草矣

余少在濟南明湖水面亭賦秋柳四章一時和者甚眾後三年官揚州則江南北和者前此已數十家閨秀亦多和作南城陳伯璣允衡曰元倡如初寫黃庭恰到好處諸名士和作皆不能及

宗稱按鈍翁說鈴王十一感秋柳賦詩四章其三云東風作絮春衣云云嚴給事沆稱此詩風調淒清如朔鴻關遂易引羈愁讀之良然近別裁集謂秋柳詩乃公少年英雄欺人語為所欺者強為注釋究之不切秋并不切柳問其何以勝人曰佳處正在不切也為之粲然竊謂四詩佳處全在情味勝人不獨如給事所指一首也若斤斤繩墨以求之恐非作者本意矣

余往如臯馬上成論詩絕句四十首從子淨名敬作注人謂

不減向秀之注莊後不三十天卒西樵并錄仲子

居易錄儀封王世治刻吳江計甫草東讀予論詩絕句記來微

士大夫詩歌紀事以計此記為予詩作也因先呈予世治跋云不肖生也晚距先肅敏公六世時已百餘年守家藏集恒

虞失墜有莫爲之後之懼康熙壬戌七月太邱王瑗郵致甫  
草計先生讀阮亭詩記一篇世治讀之不禁涕洟深歎知己  
之難而相遇之奇也世治半世俯首老諸生不能與當代賢  
士大夫挈長比藝焜耀先澤而甫草乃從阮亭王公少谷山  
人之句而致其感動痛哭之辭至欲爲先肅斂死斯亦奇矣  
嗟乎是少谷阮亭兩公之知先肅斂而總藉傳于計先生之  
一痛也海內文人其誰不願爲計先生死者哉予康熙癸卯  
在揚州一日雨行如臯道上得論詩絕句四十首蓋倣元裕  
之作其一云三代而還盡好名文人從古善相輕君看少谷  
山人死獨有平生王子衡甫草丁未於都門見此詩因作記  
今載甫里集

余在甞社湖舟中作歲暮懷人絕句六十首丙夜而畢紙盡

以公牒牘尾續之淋漓皆徧

余少客秦淮作秦淮雜詩二十餘首陳其年詩兩行小史豔  
神仙爭寫君侯腸斷句謂此也又在真州作絕句云好是日  
斜風定後半江紅樹賣鱸魚又濛濛夕照開棠色葉葉風帆  
下建康又摘星樓閣浮雲裏一傍危欄望楚江又綠楊城郭  
是揚州江淮間多寫爲圖畫後入蜀行夾江道中望峩峩三  
峯在煙雨空濛中賦詩云沈黎東上古犍爲紅樹蒼藤竹亞  
枝騎馬青衣江上路一天風雨望峩峩及入粵大雪行潛山  
唐婆嶺卽事賦詩云皖公山色望迢遙皖水清冷不上潮青  
笠紅衫風雪裏一林楓柏馬蕭蕭常欲命畫師爲寫二圖未  
果每以爲憾

已上漁洋詩話

余少時官廣陵與諸名勝修禊紅橋卽席賦冶春詩二十四



首陳其年後至贈余詩曰玉山筵上頽唐甚意氣公然籠罩  
人劉公馥曰采明珠耀桂旗麗矣或率而兒拜或揚袂從風  
如欲仙去冶春詩獨步一代不必如鐵厓遁作別調乃見姿  
媚也

香祖筆記并錄二

漁洋詩話

余少時在廣陵每公事暇輒召賓客汎舟紅橋與袁荊

州令

諸詞人賦詩有綠楊城郭是揚州之句江淮間取作畫

圖又與林茂之張祖望杜于皇孫豹人程穆倩修禊於此自

賦冶春詩二十首陳其年題其後云官舫銀鐙賦冶春琅邪

風調更誰偷玉山筵上頽唐甚意氣公然籠罩人宗定九

元鼎

詩云休從白傅歌楊柳莫向劉郎演竹枝五日東風十日雨

江樓齊唱冶春詞劉公馥曰耀明珠蔭桂旗麗矣或率而兒

拜或矯而當熊或揚袂隨風如欲仙去遺世獨立橫絕一時

不必如老鐵花游諸曲遁作別調始見姿媚也

居易錄

予嘗與袁昭令杜于皇諸名宿宴于紅橋予自爲記作

詞三首所謂綠楊城郭是揚州是也昭令酒間作南曲被之

絲竹又嘗與林茂之孫豹人張祖望

綱

輩修禊紅橋予首倡

冶春詩二十餘首一時名士皆屬和予旣去揚州過紅橋多

見憶者遂爲廣陵故事陳其年云官舫銀燈賦冶春廉夫才

調更無倫玉山筵上頽唐甚意氣公然籠罩人宗梅岑云休

從白傅歌楊柳莫向劉郎演竹枝五日東風十日雨江樓齊

唱冶春詞此例甚多丙寅丁卯間曲阜孔

尚

東塘以濟河至

揚州題詩紅橋云阮亭合向揚州住杜牧風流屬後生廿四

橋頭添酒社十三樓下說詩名曾維畫舫無閑柳再到紗窗

祇舊鶯等是竹西歌吹地煙花好句讓多情

附錄香祖筆記屠隆長卿令青浦梁辰魚伯龍過之爲演說紗記遇佳詞輒浮以大白昔袁荊州豫港于令自金陵過子廣陵與諸名士汎舟紅橋子首賦三闕所謂綠楊城郭是揚州者諸君皆和袁獨製奔曲時年八十矣曲載紅橋倡和昔張子野與東坡會飲垂虹亭年亦八十

康熙三年子與杜于皇滿陳其年維輩同在如臯修禊於昌

氏水繪園賦詩或問杜阮亭詩何如答曰與酣落筆搖五嶽

詩成嘯傲凌滄洲又問君詩何如曰但覺高歌有鬼神誰知

餓死填溝壑池北偶談 并錄二

香祖筆記余康熙乙巳春將去廣陵偶以公事至如臯圖辟疆

約余修禊水繪園別業時通州八十老人邵潛潛夫及宜興

陳其年縣人許嗣隆山濤及冒氏諸子咸在坐分體賦詩余

得七言古體坐湘中閣立成章黃岡杜于皇後至他日或

問之曰阮亭詩如何杜曰酒酣落筆搖五嶽詩成嘯傲凌滄

洲又問君詩如何曰但覺高歌有鬼神誰知餓死填溝壑

詩話卷八

自述

七

漁洋詩話

余與邵潛夫陳其年諸名士以康熙乙巳修禊冒辟疆水繪園分體賦詩余戲謂其年曰得紫雲捧硯乃可紫雲者冒歌兒最姝麗者爲其年所眷許之余坐湘中閣立成七言古詩十章後一日杜茶邨自廣陵至亦有補作或問之曰阮亭詩何如杜曰酒酣落筆搖五嶽詩成笑傲滄洲君詩何如曰但覺高歌有鬼神誰知餓死填溝壑

予在揚州日通州布衣邵潛潛夫年八十餘無妻子僑居如臯子適按部至縣邵以書來云苦門夫之役予抵縣次日晨往訪之所居狹巷不容車騎予下車徒行入蓬門陋室臥榻與竈突相接所刻書板充棟出市酤畱飲予爲引滿數觴盡歡而罷邑令聞之卽日免其徭役福清林度茂之亦八十餘數自金陵過訪每集諸名勝文宴紅橋平山堂之間予親爲

撰杖康熙甲辰除夕茂之以萬歷甲辰已來六十年詩屬予

刪定不減數千篇皆曹能始鍾伯敬譚友夏諸前輩所鉛黃

予爲存其甲子以前風華近六朝者而刪其甲子後詩幾盡

施愚山問見之曰吾與林翁久游處非君選不知其本色乃

如是君之功林翁大矣高淳老布衣邢昉孟貞五言學韋蘇

州風格甚高予至揚州昉前死已久予爲祭酒時長山李尙

書孫佐謁選得高淳令予以昉家事託之俾訪其妻子明年

李以書來云邢妻老尙無恙一弟爲老諸生一孫甚貧已辦

二百金爲買丞相圩腴田四十畝不憂饗殮矣愚山與孟貞

交最善代爲謝予予與孟貞終未識面其弟妻與孫亦不知

予誰何也成都費密字此度獻賊破蜀後流寓泰州人無知

者予偶見其五言詩曰大江流漢水孤艇接殘春愛之賦詩

者予偶見其五言詩曰大江流漢水孤艇接殘春愛之賦詩

詩話卷八

自述

八

云成都跛道士萬里下峩岷虎口身曾板蠶叢句有神大江  
流漢水孤艇接殘春十字須千古何爲失此人密見之遂來  
定交南城陳允伯璣客金陵清羸善病以予故數來揚州選  
錄國雅集予居之古文選樓頗料理之孫枝豹人三原人僑  
居揚州高不見之節予訪之先以詩云焦獲奇人孫豹人新  
詩雅健出風塵王宏不見陶潛迹端木寧知原憲貧遂爲莫  
逆交泰州布衣吳紀字賓賢居東潤苦吟不交當世予見其  
所爲五言清冷古澹雪夜被酒爲其詩序馳使三百里致之  
嘉紀大喜過望買舟至廣陵謁謝遂定交黃州杜瞻于皇客  
揚州嘗人日大雪無事中車造之論詩竟日樵蘇不爨茶話  
而已乙巳七夕予赴京師諸君餞于禪智寺祖道賦詩于皇  
詩云記逢人日雪造我吟窮愁豹人詩云欲問忘情老何名

其命禽因刻禪智錄別一卷誌一時窮交之誼今二十六年矣予嘗于役淮陰雪夜泊覽社湖作歲暮懷人絕句六十首紙盡取公文牘尾紙雜書之皆滿詩中所及大半布衣也

易錄 并錄四

漁洋詩話南通州邵潛潛夫亦萬歷詩人錢宗伯牧齋亟稱之性孤僻凡數易妻晚竟無子僑居如臯年八十矣苦徭役余適以按部至縣詰旦首謁邵邵所居委巷乃屏輿從徒步而入邵曰適有酒一斗能飲乎余欣然爲引滿流連移晷始別縣令聞之立除其役

池北偶談邵潛字潛夫自號五岳外臣南通州人性傲僻不諧俗好嫚罵人人多惡之及與李本寧鄒彥吉黃貞父陳仲醇諸公遊所著友誼錄循吏傳印史諸書多可傳者年五十無子

娶後妻成久之嫌其貧老棄去一婢又爲勢豪所奪遂隻身客如臯城西門年八十矣康熙乙巳予過臯訪之茅屋三間黝黑如漆邵筋骨如鐵白髮鬢髮被領雙眸炯然具果藪畱予飲尙盡數觴與修禊冒氏洗鉢池尙能與予輩賦詩陳其年維崧云古今文人多窮然未有如邵先生者聽其言愴然如劉孝標所自叙也予去廣陵聞邵卽以是歲下世矣

漁洋詩話杜茶村濬初名詔先黃岡人僑居金陵貧甚屢客廣陵甲辰人日大雪時方鎖印無事余造訪之清言竟日乙巳七夕余北上京師諸人祖於禪智寺卽席賦五言茶村有句云記逢人日雪造我吟窮愁謂此也

全上余在廣陵五年多布衣交甲辰內遷乙巳七夕諸詩老

送別禪智寺孫豹人

枝蔚

有句云欲問忘情老何名共命禽難



言無所住齊有淚盈襟

順治己亥客京師日聽劉公馥吏部鼓琴賦詩贈之云與君更作他年約黃鵠山中訪戴行至壬寅歲相遇於京口京口有黃鵠山在城南五六里卽招隱寺宋戴顓故居也始悟前詩蓋有定數云

池北偶談 并錄五

漁洋詩話劉公馥

仁體

吏部善鼓琴常於慈仁寺精舍彈御風操余

贈詩云與君更作他年約黃鵠山頭訪戴行京口黃鵠山戴顓所居也後五年果相遇黃鵠山下又沈文恪繹堂

荃

以箋

索書余爲書放翁詩云三疊淒涼渭城曲數枝閒澹閨中花

未幾典蜀試至閬中驛亭恍然悟前詩信數有前定哉

池北偶談

世事莫非前定所云動乎四體有不知其所以然者往

予在淮南好觀棧道圖有興化顧生符種工此技妙入毫髮

予令畫絹素屏扇凡十數自爲長歌題之復以其一贈姊夫  
劉大田倅旣而予有入蜀之役同行卽劉君也辛亥歲在京  
師沈文恪繹堂爲侍讀以小冊索書予爲書陸放翁詩云殘  
年作客遍天涯下馬郵亭便似家三墨淒涼渭城曲數枝閑  
澹閨中花擘牋授簡相逢晚理髻薰衣一笑譁俱是邯鄲枕  
中夢墜鞭不用憶京華比入蜀信宿閨中乃憶前事真詩識  
也因賦一詩寄沈葭萌關外極天涯長憶西園夜鬪茶萬事  
輸他前定在今朝真看閨中花曩丁未歲四月二十九夜夢  
中得絕句云溪鋪翡翠映煙空溪上飛橋落彩虹愛玩花蘂  
憶元相一枝渾臥碧流中旣覺不知所謂末句則元微之使  
東川所賦亞枝紅詩也至是過褒城亦驗予已酉奉使淮上  
過奉高閱泰安州誌至羸博字輒心惡之辛亥壬子遂連遭

渾沂兩兒之痛入蜀時過百牢關作一詩懷諸兄結押廬字  
忽心動曰廬廬居也得勿不祥乎又閱劔南詩有云成都放  
榜第一人楊姓具慶下愴然有感又心惡之比榜放解元果  
楊兆龍也心益動時先慈宦人已見背予在萬里外未知也  
昔阮孝緒於鍾山聽講母王忽病兄弟將召之母曰孝緒至  
性冥通必當自到果心驚而返信有是哉

蜀道驛  
程記

在京師沈繹堂侍講以箋索書予爲書陸務觀閬中詩

云殘年作客徧天涯下馬郵亭便似家三疊淒涼渭城曲數  
枝閑澹閬中花擘牋授管相逢晚理髭薰衣一笑譁俱是邯  
鄲枕中夢墜鞭不用憶京華是時予與繹堂輩方日爲文字  
之飲旣書此詩意頗不懌到閬州始省前事豈前定耶

漁洋  
詩話

余常夢中得詩云谿流翡翠映煙空谿上飛橋落彩虹

愛玩花叢憶元相一枝渾臥碧流中既覺不知所謂及使蜀  
乃悟是元微之亞枝紅詩卽使東川作也昭陽顧符稹工畫  
余尤愛其棧道圖爲賦長歌凡扇頭絹幅屏幃間皆令作棧  
道圖後壬子丙子兩使蜀此其識也又常有夢中作云涼雲  
止復行水花開更落煙柳夕陽時蟬聲動高閣

分甘  
餘話

唐鄭綮云詩思在灞橋驢子背上胡擢云吾詩思若在

三峽聞猿聲時也余少作論詩絕句其一云詩情合在空舸  
峽冷雁哀猿和竹枝用擢語也後壬子秋典蜀試歸舟下三  
峽夜泊空舸月下聞猿聲忽悟前詩乃知事皆前定

予壬子歲過新樂縣題詩驛壁寄宋荔裳

玩

蜀臬云當年霧

夕詠芙蓉促席傳觴樂未踈名忝應劉七才子座傾沈范兩  
尙書飛星過漢無畱影萍葉隨潮少定居賴有前期不相負

秋來同釣錦江魚沈范謂龔宗伯芝麓鼎梁相國蒼巖清標也

時荔裳與予先後入蜀其明年荔裳入覲卒京師龔公卽以

是歲下世戊辰梁公以司馬入相辛未卒于位今復過此舊

館已頽前題不復可見俛仰二十五年間遂如隔世益知維

摩談空理不可易也

秦蜀驛程後記

康熙庚申春予與施侍讀愚山同過宏衍菴看海棠各有四

絕句今庚午二月重來海棠三株皆已化去而愚山之墓木

拱矣不勝今昔存歿之感因復成一絕云十年不見謝宣城

目極澄江遠恨生白首重吟枯樹賦江潭蕉萃庾蘭成

居易錄

予初以詩贅於虞山錢先生時年二十有八其詩皆丙申年

少作也先生一見欣然爲序之又贈長句有騏驎奮蹴踏萬

馬暗不驕勿以獨角麟儷彼萬牛毛之句蓋用宋文憲公贈

方正學語也又采其詩入所纂吾炙集方龠山自海虞歸爲  
余言之所以題拂而揚詡之者無所不至余嘗有詩云不薄  
今人愛古人龍門登處最嶙峋山中柯爛蓬萊淺又見先生  
制作新白首文章老鉅公未遺許友八閩風如何八代論騷  
雅也許憐才到阿蒙今將五十年回思往事真平生第一知  
己也

古夫于亭雜錄 并錄一

漁洋詩話

虞山錢宗伯贈余古詩云騏驥奮蹴踏萬馬暗不驕勿

以獨角麟儼彼萬牛毛又爲作集序有與君代興之語時余  
年甫踰弱冠耳其爲所賞異如此余後有絕句云少年薄技  
悔雕蟲拂拭當年荷鉅公紅豆莊前人去久花開花落幾春  
風

京口張文選公選博物君子也嘗題予過江入吳兩集云筆

墨之外自具性情登覽之餘別深懷抱此語可與解人道香

和筆記 并錄一

漁洋詩話張吏部公選九先生題余過江集云筆墨之外自具性

情登覽之餘別深寄託

昔亾友葉文敏評余蜀道集詩毋論大篇短章每首具有二

十分力量所謂師子搏象兔皆用全力者也余深愧其言陳

元孝恭評余南海集雖不及蜀道之宏放而天然處乃反過

之此亦知言文敏又嘗語余兄七言長句他人不能及祇是

熟得史記漢書耳分廿餘話

汪鈍翁與余順治末稱詩都下忝齊名之目鈍翁有詩云俠

少場中同結駟郎官隊裏各題詩耻居王後吾何敢願作雲

龍上下隨漁洋詩話

康熙丁未戊申間余與茗文公戡玉蚪周量輩在京師爲詩倡和余詩字句或偶涉新異諸公亦効之茗文規之曰兄等勿效阮亭渠別有西川織錦匠作局在又葉文敏初菴云兄歌行他人不能到只是熟得史記漢書耳余深愧兩兄之言余少奉教於虞山婁江兩先生五十年來書尺散佚偶從鼠蠹之餘得兩先生尺牘手書不勝感歎謹錄左方。錢牧齋先生書三通。玉峯郵中忽奉長箋溫文麗藻曄如春華東風入律青雲千呂捧讀數過笑繼以忤自分以木桃之投而致瓊瑤之報私心忤營愧無以仰副德音也衰遲潦倒賣身空門舊學無幾遺忘殆盡唯有日繙貝葉銷閑送老世間文字茫然如前塵積劫門下散華落藻如卿雲在天有目共覩老人未免稊觸童心鼓動習氣欲從蒲團上颺去以此自笑



耳近日詩家如稻麻葦粟今得法眼刊定又有伯璣元覽其  
爲鑑裁廣陵當又築文選臺矣西樵詩渴欲請教郵中都未  
見寄怒如調饑我勞如何邢溝一水不能辦十日春糧趨侍  
鈴閣京江閒阻便如明河天塹可一歎也亂後篋述不復編  
次緣手散去存者什一荆婦近作當家老姥米鹽瑣細枕藉  
煙熏掌籥十指如椎不復料理研削矣卻拜尊命慚惶無地  
杜詩非易注之書注杜非小可之事生平雅不敢以注杜自  
任今人知注杜之難者亦鮮矣可歎也西江王子一苦心學  
四大家文字湓逝之後遺文散佚倘得屬伯璣搜緝序而傳  
之俾此子不爲草叾木卒誠藝林所仰望也貴門人便郵草  
率奉復老懷縷縷都無倫次唯高明亮之。僕於君家季木  
兄有同年同志之誼而司馬中丞暨令祖方伯咸以年家稱

弟畜我愛我松茂柏茂如草木之有臭味不但孔李通家也  
陵谷改遷故舊寥濶東望岱宗未嘗不鬱紆感歎頃聞門下  
雄駿絕出整翮雲霄鴻裁豔詞衣被海內才筆之士靡不捧  
盤執匱願拜下風私心慶幸以爲大槐之後復產異人新城  
門第大振於灰沈煙燼之餘禽息之精陰慶在季木可知也  
舍甥北還復示大集如觀武庫如游玉府未敢遽贅一言於  
簡端丁老繼之枉過言門下駐節水亭討論風雅風前燭下  
瞻念衰朽以爲孤竹老馬猶能識道不惜過而問焉禪力未  
固獵心復萌繙閱再過放筆爲糠粃之導良以古學日遠流  
俗波靡如門下應半千之運茗豎穎發回斡狂瀾鼓吹大雅  
故敢傾吐樸學申寫狂言直道其所厚望於門下者此時稂  
莠一區鳥鼠同穴聞僕之言必將羣喙爭鳴衆口交詛區區

之意但得以片言自效於高明斯世有一人知己豈復與軫  
才小生爭寔數於鼠穴哉序言草略有懷未盡扇頭古詩一  
章聊當百一邦溝京江盈盈一水貧病屏跡投老荒村東風  
解凍尙期裹糧襪被奉扣鈴閣庶幾樵蘇不爨明鐙永夕上  
下揚挖成千古佳話耳君家羣從比復何如季木兒郎得免  
負薪否牘末附問不盡馳念。餘生暮年銷聲息影風浪瞥  
起突如焚如介恃天慈得免要領噩夢已闌驚魂未慙遠承  
慰問深荷記存唯有向長明鐙下炷香遙祝而已伏讀佳集  
泱泱大風青邱東海吞吐於尺幅之間良非筆舌所能贊歎  
詞壇有人餘子皆可以斂手矣老耄叢殘仰承推許三復德  
音慚懼交并軫才樸學本不敢建立門戶廁足藝林幸奉先  
生長者之訓稍知撥棄俗學別裁僞體采詩餘論聊示發揮

遂使謠諑紛如彈射橫集俗習沉痾末學晦蒙醢雞并猿良  
可愍歎日星在天江河萬古歐陽公有言豈爲小子輩哉八  
十老窆餘年幾何旣已束身空門皈心勝地義天法海日夕  
研求剝心刻腎如恐不及何暇復沉湎筆墨與文人才子爭  
目睫之短長哉非旁行之書不觀非對法之論不作世間文  
字一一皆迴向波若唄讚之餘游戲諷詠禪則寒山梵志儒  
則擊壤江門可以助發道情消除蔭界假年送老如是而已  
秋柳新篇爲傳誦者攫去枚生已老豈能分兔園一席分賦  
忘憂白家老嫗刺促爨下吟紅詠絮邈若隔生無以仰副嘉  
命徒有永歎而已伯璣想尙在幸舍幸道相念寒臆裁謝臨  
風悵然。吳梅村先生書一通。增城渡江一札想已得候  
見竹西正求傳示論詩大什上下今古咸歸玉尺當今此事

非得公孰能裁乎江表多賢正恐不鳴不躍者或漏珊瑚之網如吾友許九日兄爲寒齋二十年酬唱之友十子才推第一篇什流傳定蒙鑑賞近詣益進私心畏且服之而獨苦其食貧無依卽宿春辦裝亦復不易而出門求友之難也今春坐梅花樹下讀阮亭集躍起狂叫曰當吾世而不一謁王先生誰知我者襍被買舟素筆濁酒特造門下雖幸舍多賢誰復出九日上者乎其姿神吐納書法之妙見者傾倒當以爲長史玉斧之流不徒繼美乎丁卯橋也門下延華孽秀或亦倦於津梁然如此客急宜收之夾袋咳唾所及增光長價且此君青鞵布韞由是而始無使寥落便增旅况則皆名賢傳中佳話耳

故友劉吏部公猷尺牘題跋風味不減蘇黃偶從蠹簡中得

其小札一通別錄於此潤州握手謂我猶遊戲人間喜極淚下不知公戲何人而先生眷眷若此揚署再晤見退衙時小書一屏書洛神賦壁上懸松圓詩老小景一幀匡牀棐几蕭然無點塵令人意消白沙客舍下馬踞牀爲我特畱一日集諸勝流修談讌之娛昔人有言不幸生末俗猶幸識元紫芝僕既幸識先生又辱眷眷若此想曾於無量阿僧祇劫供養承事一切慧業文人故茲生乃享此報不落落也嘗與同人言讀同時他人作雖心知其什倍於我竊復漫臆儻假以問學似若可追至吾阮亭卽使我更讀書三十年自覺去之愈遠正如仙人嘯樹其異在神骨之間又如天女微妙偶然動步皆中奇舞之節當使千古後謂我爲知言近所作旣不欲刻布可時寫一通見示僕所纂汝穎集蒙宣索繕寫寄呈先

君子遺集一卷并呈不知能邀先生跋數語不姪子詩一幅  
閨房詩一冊附發一笑粲亦委巷語耳近日兒女頗好文術  
但爲之父兄者愧無以教之然不可不令先生知之也欲言  
無窮忽已紙盡西風有便時望嗣音

已上古夫于亭雜錄

歙縣門人汪洪度于鼎寄書曰生少從諸遺老遊竊聞其緒  
論以爲詩之以仙稱者古今得四人焉曰陳思曰青蓮曰省  
山曰新城心識其語而未測其所以然稍長縱觀載籍由漢  
魏以迄於今大而塞乎無垠細而入乎無閒集古今之大成  
覓萬象而獨出者莫先杜陵尊之曰聖誠莫與京矣而新城  
公實亞之矣乃未遽尊之爲聖而僅推之爲仙何與毋亦其  
氣超乎鴻濛之先味在於酸鹹之外往往使人一唱三歎恍  
游神於溟沔駕鸞鶴摘星斗蒼蒼然遠而無所至極矣而實

不在格調音響間也島嶼雲霞有目者莫不瞥然一見而實有不可卽者然則其不遽尊爲聖者智未足以知而其推之爲仙者殆亦有如列子所云藐姑射之神人邯鄲生所歎以爲天人者非先生不足以當之歟要非熟復五先生之書咀其菁華探其根柢猶未知諸遺老之言之不我欺也因思仙聖間代而生生又同時久擬褭糧三月北學遊燕執經問業計毛髓縱難洗伐而流風可起懦頑逡巡至今未果斯願已又思鄙人居處雖近黃山碧溪而耳目終在塵土倘得飛仙吹噓所及不必入海求蓬萊仙仙乎亦足以遺世焉昨歲不揣卑賤屬敝郡吳司成代陳以黃山始信峯草堂杏花春雨橫圖卷奉乞鴻章洎司成書至謂先生一身繫天下之重政府精勤雖甚存注而筆墨未遑生聞之而蹕蹕然怦怦然唯



懼其究未易得也敢因家弟孝廉滢公車之便再申前請伏冀先生吐握之餘錫以五字咳唾九天隨風珠玉引雞犬而納之雲中或亦度世真仙所慈憫而不終遐棄者也璫瑁筆牀一具松明茶一斤附貢主臣

居易錄

雲間董□□孝廉俞之弟也自京師寄余書略曰先生具不世出之才悟最上乘之道光燄萬丈仙佛一身天下學人如百川之赴海不肖幼待先伯父得仲從兄蒼水論詩必首推先生全體學杜而鐸化諸家做鄉吳日千何次張張洮侯袁价人張慧曉諸君子時時過舍亦必稱先生昆仲之詩爲人天手眼後養疾吳門得見堯峯汪鍾翁先生屈指海內詩人唯新城爲大家若某某但可稱名家未能比肩也云云余深愧諸良友之言而老成凋謝墓有宿草久矣可勝三歎

分廿餘語

宗柳附議錄余門人方扶南世舉嘗問曰阮翁其大家乎曰然孰匹之余曰其朱竹垞乎王才美于朱而學足以濟之朱學博于王而才足以舉之是真敵國矣他人高自位置強顏耳曰然則兩先生殆無可議乎余曰朱貪多王愛好按同時諸家稱山人詩益美或亦有之其奉為大家實無異詞宮贊意多不盡而推引如是且持議甚平固知言之選也

白樂天自寫其集三本一置東都聖善寺一置廬山東林寺一置蘇州南禪院自云願以今生世俗文字之因轉為來世讚佛乘轉法輪之緣余昔亦嘗以漁洋集一本付楚雲師藏之南嶽一本付拙菴師藏之盤山昨門人劉翰林太乙青言欲以八分手書余正續集藏之嵩山少林寺亦香山居士後一段佳話漁洋詩話 并錄一

分廿餘話古人著述詩文一生心力所寄必有所托以思傳於後世如白樂天寫集三本一付廬山東林寺一付蘇州南禪寺一付龍門香山寺陸魯望詩文手稿盡實白蓮寺佛像腹中

唐求詩草寘大瓢中投諸岷江之流皆名心未忘故也如來  
自言四十九年未曾說著一字乃亦以身後結集屬大迦葉  
豈名心亦未盡忘耶頃襄城劉太乙翰林書來云欲自作八  
分書余漁洋蠶尾諸集詩藏於少林代余謀所託意豈厚因  
述此以報之

帶經堂詩話卷八